



IRSYAD

Soalan

Assalamualaikum. Didapati imam di sebahagian masjid melakukan ruku' sehingga selesai baru takbir. Begitu juga dengan rukun perbuatan lain seperti sujud. Adakah ini sesuai dengan sunnah? Mohon beri pencerahan sesuai sunnah.

Jawapan

JAWAPAN

Walaikumsalam warahmatullahi wabarakatuh

Alhamdulillah, segala puji dan syukur dipanjatkan kepada Allah *Subhanahu wata'ala*. Selawat dan salam kami ucapkan ke atas junjungan besar Nabi Muhammad *Sallallahu 'alaihi wasallam*, para isteri dan keluarga baginda, para sahabat, seterusnya golongan yang mengikuti jejak langkah baginda sehingga hari kiamat.

Persoalan di atas adalah berkaitan dengan takbir *intiqaal*. Takbir *intiqaal* ialah takbir yang dilafazkan ketika berlakunya perpindahan daripada satu rukun kepada rukun yang lain dalam solat. Menurut mazhab Syafi'i, disunatkan memulakan takbir *intiqaal* ketika seseorang itu mula bergerak untuk berpindah daripada satu rukun, serta memanjangkannya sehingga sampai ke rukun yang seterusnya. Hal ini sepertimana yang dinyatakan oleh Imam an-Nawawi *rahimahullah* dalam kitab *al azkar* :

يُسْتَحَبُّ مَدُّهُ إِلَى أَنْ يَصِلَ إِلَى حَدِّ الرَّكْعَيْنِ، فَيَسْتَعْلُ بِتَسْبِيحِ الرُّكُوعِ؛ لِئَلَّا يَخْلُوَ جُزْءٌ مِنْ صَلَاتِهِ عَنْ ذِكْرِ

Maksudnya: *"Disunatkan memanjangkan lafaz takbir itu sehingga sampai kepada had rukuk. Kemudian setelah berada dalam rukuk, dia terus membaca tasbeih rukuk supaya tidak ada satu bahagian pun daripada solatnya yang kosong daripada zikir kepada Allah."*

Begitulah juga halnya dengan takbiratul *intiqaal* bagi perbuatan dalam solat yang lain. Semuanya dipanjangkan memenuhi pergerakan sehingga sampai rukun yang seterusnya.

Kesimpulannya, lafaz takbir *intiqaal* (takbir perpindahan) disunatkan bermula ketika seseorang mula berpindah daripada satu rukun kepada rukun yang lain, dan dipanjangkan bacaannya sehingga sampai kepada rukun yang seterusnya. Cara ini lebih menepati sunnah Nabi *Sallahu alahiwasallam*.

Namun demikian, sekiranya perkara tersebut tidak dilakukan, solat tetap dihukumkan sah dan tidak dituntut untuk melakukan sujud sahwi.

Wallahu a'lam.

JABATAN MUFTI SARAWAK